

**Nunatsinni ilinniartut amerlanerusut ilinniarnermi naammassisalernissaat siunertaralugu, nuna tamakkerlugu ilinniagaqartunut tarnikkut inooqatigiinnikkullu siunnersuisarfimmik (studenterrådgivning) Naalackersuisut pilersitsinissamik peqquneqarnissaat pillugu Inatsisartut aalajangiiffigisassaattut siunnersuut**

(Inatsisartunut ilaasortaq Kaali Olsen, Inuit Ataqatigiit)

**Akissuteqaat**

(Ilinniartitaanermut, Iisimatusarnermut Nunanullu Avannarlernut suleqateqarnermut Naalackersuisoq)

**Siullermeerinnineq**

Naalackersuisut siunnersuummut qujapput, taannalu ilinniartut ilinniarnerni tarnikkut inooqatigiinnermilu apeqqutit pillugit siunnersorneqarnissamik pisariaqartitsinerup tamarmiusumik suliniutit ilagisinnaavaat.

Kontomi pingaarnermi 40.01.08 Ilinniartitaanermut pilersaarut kiisalu ilinniartitaanerup immikkut ittumik suliniuteqarfigineqarnera ullumikkut aningaasaliisoqareerpoq, tassunga ilanngullugit inuusuttunut ilinniartunullu siunnersuinerit. Naalackersuisoqarfiup 2010-12 naatsorsuinerata kingulliup takutippaa ukiumoortumik aningaasaliissutit pingajorarterutaat inuusuttunut ilinniartunullu siunnersuinerit tapiissutit aningaasaliissutigineqartartut.

Suleqatigiissitaliap, taamaatiinnartarnernik annikillisisiniarluni suliniutinut tapiissutinik agguasartup, inuusuttunut ilinniartunullu siunnersuinerit pillugit 2011-12-imut nalunaarusiaq tunniuteqqammerpaa. Nalunaarusiaq naalackersuisoqarfiup nittartagaani atuarneqarsinnaavoq.

Nalunaarusiap takutippaa inuusuttut assersuutigalugu ajortunik misigisaqartanerup kinguneranik tarnikkut inooqatigiinnermilu ajornartorsiuteqartut, aammalu meeqqat inuusuttullu atugarissaarnerannik misissuinerit arlalinni tikkuarneqarpoq meeqqat inuusuttullu amerlasuut sumiginnagaasimasut.

Siunnersuinerit taamaatiinnartarnernillu pinaveersaartitsineq imminnut toqqaannartumik atassuteqarnerat takuneqarsinnaanngikkaluartoq, siunnersuisuunerni tamani naliliisoqarpoq, inuusuttut ajornartorsiutinik ikiorneqarfigisinnaasaminik saaffiginniffissaqarnissaat pingaaruteqartorujussuaq.

Ilinniartut amerlanerusut tarnikkut inooqatigiinnermilu ajornartorsiuteqartut ilinniarnermi naammassinnittarnissaat siunnersuummi aallaavigineqarpoq. Naalackersuisut isumaqatigaat taamaatiinnartarnernut pissutaasut oqallisigissagutsigit pissutsit taakku isiginiarnissaat pingaaruteqartorujussuusoq. Tassunga atatillugu oqaatigineqarsinnaavoq GU-mik aqqissusseqqinnermut atatillugu taamaatiinnartarneq pillugu suliniutinut aningaasaliisoqarnikuusoq, tassunga ilanngullugu tarnip pissusaanik siunnersuisarnermut.

Siunnersorneqarnissamik ikiorneqarnissamillu periarfissat arlallit allat Naalackersuisut aamma innersuussutigissavaat. Taakku assersuutigalugu tassaasinnapput meeqqanut inuusuttunullu telefoni 134, Attavik 146, ilaqutariinnik telefonikkut siunnersuisarfik aamma peqatigiiffik Tasiorta. Meeqqanut

inuusuttunullu inunnullu kinguaassiuutitigut atonerlunneqarsimasunut suliniutinut aningaasanik inatsimmi aamma aningaasaliisoqarnikuuvoq. Ilaqutariinnermut, Kultureqarnermut, Ilageeqarnermut Naligiissitaanermullu Naalackersuisoqarfimmi Pinartoqartillugu Upalungaarsimasut ajornartorsiortoqarnerani kommunit iliuseqarnissamat pisariaqartunik sulisussaqaannginneranni ikiuisarpoq. Taassuma saniatigut kommunit ilaat namminneq ajornartorsiortoqarneranut piareersimatitsisoqarput. Neqeroorutit taakku tamanik isiginninniarnermi eqqarsaatigineqartariaqarput.

Inatsisartunullu ilaasortap Kaali Olsenip siunnersuutaa ingerlaqqinneruvoq, tassani siunnersuutigineqarmat meeqqat atuarfiata kingorna ingerlaqqilluni ilinniartunut nuna tamakkerlugu ilinniartunut siunnersuisarfimmik pilersitsisoqassasoq. Siunnersuutip piviusorsioruunera nunallu immikkoortuini sumiiffinnilu ullumikkut pisariaqartinneqartut ikiorsiivigineqarsinnaanersut Naalackersuisut misissorusuppaat. Psykologit ataatsimut isigalugu pisariaqartinneqartorujussuupput, siunnersuutillu piviusunngortinneqarnissaanut sulisut pisariaqartut sulisussarsiarineqarnissaat tunngaviusussat ilagaat. Siunissami aaqqiinissami ilinniartut tarnikkut annertuunik ajornartorsiuteqartut katsorsarneqarnissamik innersuunneqarnissaasa eqqarsaatigineqarnissaa aamma pisariaqarpoq.

Ilimagineqartariaqarpoq nuna tamakkerlugu siunnersuisarfik assersuutigalugu ajornartorsiuteqartoqartillugu sukkasuumik ikiorsiisarnissaq ajornakusoortissagaa ilimagineqartariaqarpoq, taamaammallu nunap immikkoortuini sullissiviit sisamat iluaqutaasinnaanersut isumaliutigineqartariaqarluni. Taamaatiinnartarnerit ikilisinnissaanut suleqatigiissitaliap tikkuarppaa sumiiffinni periarfissat sukkasuumik ikiorsiinissamat pingaaruteqartorujussuusut.

Inatsisartunut ilaasortap Kaali Olsenip siunnersuummini oqaatigaa, ilinniartitaanermut aningaasaliissutit atuuttut iluanni tamanni piviusunngortinneqarsinnaasoq. Naalackersuisut isumaqarput siunnersuutip akuersissutigineqarpat immikkoortumut tassunga taamaatiinnartarnerit pillugit suliniutinut aningaasaliissutit iluanni aningaasalersorneqarsinnaanngitsoq, taamaammallu ingerlatanut allanut aningaasaliissutit nuunneqarnissaat pisariaqassalluni. Taamaammatt Naalackersuisut siunnersuummik suliaqarneq ingerlateqqissappassuk aningaasartuutit tamarmiusut misissornissaat pingaaruteqarpoq.

Siunnersuutip akuersissutigineqarnissaa Naalackersuisut inassuteqaatigaat, tassa siunnersuut nammineq soqutiginarpat, inuusuttullu tarnikkut atukkatigullu ajornartorsiuteqartut ilinniarnerminnik naammassinnissinnaalersinniarlugit pisariaqartunik siunnersorneqarsinnaanerannut ikiorserneqarsinnaanerannullu – immaqalu katsorsarneqarsinnaanerannut – ataqatigiissaarilluni suliniuteqarnissamat periarfissat Naalackersuisut misissorusuppaat.